

दिनांक 18.02.2025

समय: 18.45 बजे

- राज्य रो माली साल 2025-26 रो बजट काल-उपमुख्यमंत्री अर वित्त मंत्री दिया कुमारी विधानसभा मांय संवारे 11 बज्यां पेश करेला।
- केन्द्रीय जलशक्ति मंत्री सी.आर. पाटिल कह्यो-देश ने साल 2047 ताई जल सुरक्षित राष्ट्र बणावण सारु असरदार कार्य योजना बणा र काम कर्यो जा रह्यो है।
- राजस्थान समेत 26 राज्यां अर केन्द्र रा राज वाळा प्रदेशां रा 152 शहरां सारु आज नक्शा प्रोजेक्ट सुरु करी ज्यो-शहरी सम्पत्ति रा नक्शा बणावण सागे ई जायदाद रो रिकॉर्ड दुरुस्त व्हेला।
- राइजिंग राजस्थान रा तैत खनन हलका ऊं जुड्या 30 हजार करोड़ रुपया ऊं बत्ता रा करार माथे काम कर्या जा रह्या कामां रो जायजो लेवण सारु मीटिंग राख्यी ज्यी।

000

वित्त मंत्री दिया कुमारी विधानसभा मांय काल संवारे 11.00 बज्यां राज्य रो माली साल 2025-26 रो बजट पेश करेला। वे आज बजट ने फाइनल कीनो। ई मौके अतिरिक्त मुख्य सचिव अखिल अरोड़ा, प्रमुख शासन सचिव देबाशीष पृष्टि, शासन सचिव नवीन जैन, शासन सचिव कुमारपाल गौतम अर निदेशक, बजट बृजेश किशोर शर्मा मौजूद हा। राज्य री मौजूदा सरकार रो ओ दूजो बजट है। बजट ऊं नौजवानां, किसानां अर महिलावां समेत न्यारा-न्यारा तबकां ने केई ऐलाण री उम्मीद है। भीलवाड़ा जिला रा एक किसान कह्यो के बजट मांय किसान क्रेडिट कार्ड रे ज़रिए लिया ज्यो कर्ज माफ़ करण अर खाद-बीज टेम सर मुहैया करावण री व्यवस्था करण रा ऐलाण कर्या जावणा चाहिजे।

.....

पाली मांय सी.ए. कर रही छात्रा लहर रोहट मांय बेगा ऊं बेगा कारखाना लगावण ऊं जुड्या ऐलाण री उम्मीद जतायी।

000

जलशक्ति मंत्री सी.आर. पाटिल कह्यो है के भारत ने साल 2047 ताई जल सुरक्षित देश बणावण रा मकसद ऊं असरदार कार्य योजना माथे काम कर्यो जा रह्यो है। वे आज उदयपुर मांय वाटर विज़न सम्मेलन मांय बोल रह्या हा। श्री पाटिल कह्यो के नुवी पी.के.सी. लिंक परियोजना ऊं आवता बगत मांय प्रदेश ने मोटी तादाद मांय पाणी री पूर्ति तैय करी जा सकेला। वे जल जीवन मिशन ने पाणी री परेशानियां आगी करण रो असरदार ज़रियो बतायो। जलशक्ति मंत्री कह्यो के ई मिशन रा तैत देश रा 15 करोड़ घरां मांय पीवण रो साफ़ पाणी मुहैया करायो जा रह्यो है। केन्द्रीय मंत्री कह्यो के बिरखा रो पाणी भेलो करण सारु लगातार काम चलाया जा रह्या है।

.....

कार्यक्रम मांय मुख्यमंत्री भजनलाल शर्मा कह्यो के पाणी बचावण रा जतन कर र पाणी रा हलका मांय खुद रे पाण ऊबा व्हेवण री दिशा मांय आगे बढ़्यो जा सके है। वे कह्यो के जल आत्मनिर्भरता सारु सुव्यवस्थित रोड़ मैप री ज़रूरत है। मुख्यमंत्री कह्यो के इण मांय खेती-बाड़ी अर शहरी जल प्रबंधन अर तकनीकी नवाचार रा पहलू ई शामिल कर्या जावणा चाहिजे।

ई पाछे जलशक्ति मंत्री महाराणा प्रताप गौरव केन्द्र परिसर मांय कर्मभूमि से मातृभूमि अभियान रा तैत जल संचय-जनभागीदारी रा अंतर्गत बोरवैल कार्यक्रम री सुरुआत कीनी। कार्यक्रम मांय ओडिशा रा मुख्यमंत्री मोहन चरण मांझी अर त्रिपुरा रा मुख्यमंत्री माणिक साहा, जल शक्ति राज्यमंत्री राजभूषण चौधरी, राज्य रा जल संसाधन मंत्री सुरेश रावत अर केई राज्यां रा जल संसाधन मंत्री मौजूद हा।

000

चुनाव आयुक्त ज्ञानेश कुमार ने मुख्य निर्वाचन आयुक्त बणायी ज्यो है। वे केरल कैडर रा 1988-बैच रा रिटायर्ड आई.ए.एस. अहलकार है। ई सागे ई डॉ. विवेक जोशी ने नुवा चुनाव आयुक्त बणायी ज्यो है।

000

राजस्थान समेत 23 राज्यों अर केन्द्र रा राज वाळा तीन प्रदेशां रा 152 शहरां मांय आज नक्शा प्रोजेक्ट सरु करी ज्यो। केन्द्रीय कृषि अर किसान कल्याण मंत्री शिवराज सिंह चौहान मध्यप्रदेश रा रायसेन ऊं इण री सरुआत कीनी। ई मौके वे कह्यो के नक्शा कार्यक्रम ऊं जायदाद रा नक्शा बणेला अर संपत्ति रो रिकॉर्ड दुरुस्त कर्यो जा सकेला, जिण ऊं ज़मीं ऊं जुड़्या झगड़ा-टंटा कम करण मांय मदद मिलेला।

.....

प्रदेश मांय नक्शा प्रोजेक्ट री सरुआत रो राज्य स्तर रो कार्यक्रम जयपुर मांय राख्यी ज्यो। इण मांय नगरीय विकास अर आवासन मंत्री झाबर सिंह खर्वा कह्यो के ई परियोजना ऊं शहरां मांय जायदाद रो सटीक सीमांकन व्हे सकेला अर शहरी विकास हलकां मांय ज़मीं ऊं जुड़ी प्रक्रिया साफगोई सागे तुरत पूरी व्हेला। वे कह्यो के इण ऊं लोग वां री जायदाद री जाणकारी ऑनलाइन कर सकेला। प्रदेश मांय ई प्रोजेक्ट सारु भिवाड़ी, बगरु, बहरोड़, किशनगढ़, ब्यावर, अर नाथद्वारा समेत दस ठोडां चुण्यी ज्यी है। आं मांय ड्रोन सर्वे रे जरिए डिजिटल मैपिंग करवा र ज़मीं रा हक ऊं जुड़्या रिकॉर्ड ने डिजिटल बणायो जावेला। ब्यावर मांय ई कार्यक्रम रो सीधो प्रसारण बतायी ज्यो, जिण ने ज़िला कलेक्टर समेत मोटी तादाद मांय लोग देख्यो।

000

राइजिंग राजस्थान रे दौरान खनन हलका ऊं जुड़्या 30 हजार करोड़ रुपया ऊं बत्ती रकम रा करार ऊं जुड़्या काम सरु व्हेवण लाग्या है। खान विभाग रा प्रमुख शासन सचिव, टी. रविकान्त बतायो के आं मांय एक हजार करोड़ रुपया ऊं बत्ता रा 20 अर सौ करोड़ ऊं एक हजार करोड़ रुपया ताई रा 25 करार शामिल है। श्री रविकांत समिट रे दौरान माइनिंग हलका सारु करी ज्यो करार ऊं जुड़्या कामां री प्रगति रो आज जायज़ो लीनो। वे बतायो के निवेश रा प्रस्ताव देवण वाळां सागे विभाग लगातार संपर्क राख रह्यो है।

000

दौसा मांय बाइपास कने आज कार अर ट्रेलर री टक्कर रे कारण पांच जणां री मौत व्हे गयी अर दो जणा ज़ख्मी व्हे ग्या। दौसा रा डी.एस.पी. रवि प्रकाश शर्मा बतायो के कार मांय सवार लोग प्रयागराज महाकुंभ मांय जा र पाछा आ रह्या हा।

.....

उत्तर प्रदेश रा इटावा मांय ई कार अर ट्रक री टक्कर रे कारण भरतपुर ज़िला रा नदबई हलका रा तीन जणां री मौत व्हे गयी अर दो जणा घणा ज़ख्मी व्हे ग्या। अ लोग ई महाकुंभ मांय जा र पाछा आ रह्या हा। दूजी कानी बीकानेर ज़िला रा नोखा हलका मांय एक सरकारी स्कूल मांय खेलती बगत पाणी रा टैंक मांय पड़ जावण ऊं तीन टाबरियां री मौत व्हे गयी।

000

वरिष्ठ नागरिक तीर्थ यात्रा योजना रा तहत आज पाली ऊं मुफ्त भारत गौरव रेलगाड़ी रवाना व्ही। इण मांय 776 मुसाफिर है। आ गाड़ी अयोध्या, हरिद्वार अर ऋषिकेश मांय दर्शन करावेला। देवस्थान विभाग रा सहायक आयुक्त रेल ने ढोल-नगाड़ां बीचे हरी झंडी बता र रवाना कीनी। इण रा एक मुसाफिर हनुमान भाटी बुजुर्गा सारु मुफ्त तीर्थ यात्रा योजना चलावण बाबत् राज्य सरकार रो आभार जतायो।

000

राज्य मांय पश्चिमी विक्षोभ रा असर ऊं लारला 24 घंटां रे दौरान जयपुर, जोधपुर अर बीकानेर संभाग मांय केई ठोडां छांटो-छिड़को व्ह्यो। बीकानेर, श्रीगंगानगर, जैसलमेर अर बाड़मेर ज़िलां मांय ई बादळा मंड्या रह्या अर केई हलकां मांय ज़ोरदार बायरो बाज्यो। आवता दो दिन ताई एड़ो ई मौसम रेहवण रा आसार है। शेखावाटी मांय काल तेज बायरो बाजण अर हल्की बरसात री संभावना है।

000

प्रधानमंत्री नरेन्द्र मोदी आकाशवाणी ऊं हर महीना प्रसारित कर्या जावण वाळा खास कार्यक्रम मन की बात मांय 23 फरवरी दीतवार ने विचार बतावेला। आ ई कार्यक्रम री 119वीं कड़ी व्हेला। ई कार्यक्रम सारु आप ई 21 फरवरी ताई राय मुफ्त नम्बर 1800-11-7800 माथे भेज सको हो। ई रे अलावा 1922 नम्बर माथे मिस्ड कॉल रे जरिये मिल्या लिंक ऊं ई राय दी जा सके है। आप नरेंद्र मोदी एप अर माई जीओवी ओपन फोरम रे जरिये ई राय दे सको हो।

000